

25/05/2024

Aizawl

1830 Hrs

## REGIONAL NEWS

### HEADLINES:-

1. Ramchunga civil chawimawina sang Padma Shree Award dawngtu, TNT Founder Pu Sangthankima lawmman dawn lawmna inkhawm Chief Minister Pu Lalduhoman a hmanpui.
2. Home Minister Pu K. Sapdanga chuan faina kawngah Aizawl khawpui in harh tharna a chang mek a ti.
3. Lok Sabha inthlan thawhruknaah tlai dar 3 thleng khan vote zaa 49 a tla.
4. Papua New Guinea-a leimin avanga thi zat chu mi 300 an tling tawh.

<><><>

### CM

Ramchunga civil chawimawina sang Padma Shree Award dawngtu, TNT Founder Pu Sangthankima lawmman dawn lawmna inkhawm vawiina TNT, Muanna Veng, Zuangtuaia neih chu Chief Minister Pu Lalduhoma leh a nupui Pi Liansailovi ten an telpui a.

Thusawiin Chief Minister chuan, Sawrkarna an siam tan tirh khan mahni in pawh tlawh hmasa lovin TBCC a tlawh hmasa a, thalai ruihhlo ngai te a vei a, chhanchhuah tumin hma an la chho mek a ni, a ti. Ruihhlo Do Core Committee, hun rei tak thu tawh lo, pawh tinung lehin tunhnaiah an thukhawm a, ruihhlo do turin hma an la dawn a ti.

Pu Lalduhoma chuan Pathian koh a rawngbawltute thuawih chu malsawmna a ni a ti a, Pu Sangthankima pawh Pathianin a kohna ang taka hnathawktu a ni a. Amah thawhputu zawng zawng ten a thu lo awih zel sea ti a. Pathian duh dan ang zela kalin Pathian a chawimawi tlat a, nasa takin Pathianin a chawimawi let ve ta a ni, a ti. .

Padma Shree Dr. Sangthankima pawhin thusawiin, chawimawina a dawn laia a rilrua lang chu a pa a ni a, a pa khan India President chenna a ngaisang hle a, a chanchin a hrilh thin a. Chu in ropuiaah ngei chuan a fapa soal berin lawmman a dawng khan a hnuk a ti ulh, a ti.

Home Minister Pu K. Sapdanga pawhin thusawiin, harsatna tawk mi sing tel lo enkawl tawhtu Pu Sangthankima hnathawh chu a ropui a. A lawmman dawn pawh a phu ngawih ngawih a, ani tluka phu an awm bik chuang lo a ni, a ti.

Thutak Nunpuitu Team, TNT hi Pu Sangthankima hian kum 1984 November ni 4 khan Champhai daiah a kalpui tan a. A hnuah Aizawl lamah insawnin Durtlangah bul an tan a, a hnuah tuna an awmna ram hi Pu K. Thangzuala'n a hmantir ta a ni. TNT hian thalai chhanchhuah ngai mi 43,355, Pangpar huanah mi 2,414 leh fahrah 939 an enkawl tawh a ni. Tun dinhmun bikah an Addict Centre pahnihah mi 840, Pangpar huanah mi 550 leh fahrah 340 an nei mek a. An enkawl zingah hian hnam dang engemawzat an tel a. Aizawl pawn lamah Kolasib ah mi 367,

Lungleiah 720, Champhaiah 320 leh Tahanah mi 250 an enkawl mek bawk. TNT atanga tha taka enkawl chhuah tawh TNT Team worker 94 an awm mek a. TNT atanga pawl 10 pass hi naupang 184 an awm tawh a, BA leh MA thlenga pass pawh an nei nual tawh a ni.

<><><>

### CYCLONE WARNING

Bay of Bengal-a Cyclone chuan Bangladesh leh West Bengal leh a chhehvel te a nuai tel dawn avangin vawiin atangin Mizoram hmun hrang hrang- a bikin Mamit, Kolasib, Aizawl, Champhai, Serchhip, Lawngtlai leh Siaha District-ah thlipui leh ruah a thawh ve rin a ni a,

Aizawl Meteorological Centre Director Sudheer Kumar Dwivedi hnen atanga thu dawn danin, District dang Lunglei, Saitual, Hnahthial, Khawzawl te chuan ni 27 khian ruah leh thlipui, a nat zawng 50 to 60 emaw 70 kmph-a nain a thawh rin a ni a ti.

Aizawl DC chuan vawiin khan thuchhuah siamin Bay of Bengal chhim chhak lama thlipui insiam mek, Cyclone Remal tia hming an vuah chuan a hrut theih tur zingah Mizoram tel lo mahse, Mizoram-ah ruah a rawn thlen tura ngaih a ni a. May ni 26 leh May ni 27 ah hian Mizoram hmun thenkhatah thli na vak lo thawk thei a ngaih thu a chhhuah.

Thlipui chungchangah hian mipuite chia lo turin a hriattir a, amaherawhchu mipuite thlipui leh ruah thleng thut palh thei laka fimkhur tur leh inring turin a ti a.

Khuarel chhiatna a lo thlen in District Emergency Operational Centre Toll Free Number- 1077 –ah engtik lai pawha biak pawh theih reng a ni a, engemaw vanga line tlang thei lo a nih pawhin mahni bialtu Zonal Officers te hnenah chhiatna thlen thu hriattir theih a nih thu Aizawl DC chuan mipui te a hriattir a ni.

<><><>

### DM&R

Kumin hian Mizoramah thli, ruah leh rial thawk avangin In 4726 a chhia a, heng zinga 201 chu luah zui tlak lohin a chhe vek a ni.

Disaster Management & Rehabilitation minister Pu K. Sapdanga hova nimina furpui hmachhawn dan leh lo inhmakhua lawk dan ngaihtuaha thutkhawmah he thu hi tarlan a ni a, report-a a lan danin kuminah thli, ruah leh rial thawk vangin Mizoramah In chhe vek 201, luah zui tlak tawh loha chhia 630 leh thawmthat deuha luah leh nghal theih 3895, a vaiin In 4726 a awm.

Pu K. Sapdanga chuan Mizoram inlinghing, leimin, tuilian, thlipui leh a dang a tuar fo a. Nunna hial hloh leh chenna in chhia an hre fo thin a. Kuminah fur hun pangngai a thlen hma hauhin chhiatna an tuar fe tih a sawi a. Khaw thenkhat ruahsur, thli leh rial tuar nasa zual an awm a, chhiat tawkte an tawrhpu rualin State Disaster Response Fund atanga tanpuina awm thei leh kaihhruaina awm ang zela chhawmdawl thuai a tul, a ti a. A hlimchhawn, an mamawh laia tanpuina pek a hlu bik tih sawiin SDRF norms anga puihna an pek theihna turin hun an mamawh a, chuti chung chuan a hun takah pehhel khawtlai loin, an mamawh lai taka pek ngei an tum tur a ni," a ti.

Home Minister chuan tunhnaia ruah leh rial avanga hmun hrang hranga harsatna thlengah District Disaster Management Authority/DC te hmalakna leh an mawhphurhna hlenchhuah danah an remhriat dan a inchen lo viau nii a sawi a, furpui a intan dawn a, eng harsatnain nge min tlakbuak dawn hriat a ni lo a, hei vang hian District tina DC leh DDMA chairman te chu inbuatsaih lawk turin a

chah a, state sorkar pawh chhiatna tawkte pui nghal thei turin a inpeih reng a ni, tiin a sawi bawk.

<><><>

#### MNF PRESS CONFERENCE

MNF Senior Vice President Dr. R. Lalthangliana chuan Lok Sabha inthlana Mizoram Armed Police 1047 ten vote an thlak thei lo chu Mizoram sorkar inthlahdah vang a ni a ti a, vote thlak thei lo police te lakah ZPM sorkar chu ngaihdam dil turin a ti bawk.

Vawiin khan Aizawl Press Club-a chanchinbu mite hmaah he thu hi sawiin, Mizoram Armed Police atanga Election Duty tura tirh chhuahte chu Company 15, sipai 1047 an ni a, state pathum Bihar, Uttar Pradesh leh Madhya Pradesh-ah te duty tura tirh an ni a, Mizoram sorkar chuan heng police officer rualte Election Duty tura a tirh liam hma hian Postal Ballot hmanga vote an thlak theih dan tur ruahmanna siam theih a ni ngei dawn tih chiang reng chung si a, vote thlak thei lo tura ruahmanna a siam chu police te dikna chanvo rahbehsakna langsar tak, Mizoram Election History ah thil la thleng ngai lo a ni a ti.

Dr. R. Lalthangliana chuan, hemi chungchang chiang zawka hriat tumin an hotuten theih tawp an chhuah tih a sawi a, chumi atanga an hmuh chhuah dan chuan sorkar laipuaia Ministry of Home Affairs atanga ngenna Mizoram sorkarin a dawn bawhzuiin, Mizoram sorkar thuneitute chuan vote an thlak dan tur pawh engmah ngaihtuah felsak hmasa lovin heng sipai te hi state pathum-a Election Duty turin an pawngpaw tirh liam tawp mai niin a sawi a, chuang chuan Mizorama vote thlak ni April ni 19-ah vote an thlak ve thei ta lo a ni, a ti.

MNF Senior Vice President chuan, Chief Minister, IPS officer nihna bansana ram mipuite hmangaih avanga politics field-a zuanglut ta nia insawi thin chuan Zoram police officer-te a ngaihsak tawk lo a ti a, state danga dan keng kawh tura central sorkarin an nawm an maka an pawt kual chung pawha a ngawih reng avangin MNF chuan an thlavang an hauh niin a sawi bawk.

<><><>

#### HOME MINISTER

Home Minister Pu K. Sapdanga chuan faina kawngah Aizawl khawpui in harh tharna a chang mek tih vawiin-a Save the Riparian te huaihawta Aizawl Khatla lui thianfaina hnatlangah a sawi.

Pu Sapdanga chuan Save the Riparian te hmahruainain Aizawl chauh ni lo, Mizoram hmun hrang hrangah lui dung thenfai nachang an hre ta a, Mizo mipuite hian zui tur dik a hmuh phawt chuan hmun ṭawp leh ṭawp lo thliar lovin lui dung pawh an suar peih mek a. A bikin Aizawl khawpui hian faina kawngah hma a hruai a ngaia, state capital ber hi entawntlaka khawsak kan zir a ngai a ni, a ti.

Hnatlang hi MLA leh Minister ṭhenkhat ten an ṭawiawm bawk ani.

<><><>

#### ASF

Lai Autonomous District Council-a Veterinary Officer Dr. Lalnunpuia Chinzah chuan LADC huamchhungah vawk pul hri African Swine Fever vanga Vawk damlo a awm an hriat loh thu Lawngtlaia Akashvani corr zawhna chhangin a sawi.

ASF hrileng kumina a awmthar leh tantirh atangin LADC hnuaiia AH&Vety Department chuan Dr. Lalnunpuia Chinzah hovin khaw hrang hrang ah free clinic

neiin hma an la nghal a, tunkar chung pawh khan Sangau RD Block huamchung khaw thenkhat an tlawh.

An tlawh kuaah te Vawk damlo, ASF vei an hriat loh thu Dr Lalnunpuia chuan sawiin, hri laka venna tur Vawk In silfaina tur damdawi te semin a hmandan an zirtira, ASF laka an inhim nan tih tur leh tih loh tur Vawk vulhtute hrihlin invenna chuan awmzia a nei hle a an hriat thu a sawi.

Free Clinic hi Vawk, Ui leh Ar vulhtuten an pan nasa zuala, ran damlo, Free clinic neihna a kalpui remchang lo te chu Vety Doctor hovin an pan a, an mahni rawntute hnen ah ran damdawi a thlawnin an sem thin.

Dr. Lalnunpuia Chinzah chuan tangkai leh hlawk taka Free Clinic an neihtheihna chhan chu Village Council leh Branch YLA ten theihtawp an chhuahpui vang niin a sawi.

<><><>

#### 6<sup>TH</sup> PHASE LOK SABHA ELECTION

Lok Sabha inthlan thawrukna waviin khan tluang taka zawh a ni a.Hriat theih chinah tlai dar 3 thleng khan vote zaa 49 a tla.

Tun tuma inthlanna buatsaihna te hi Bihar a Lok Sabha bial 8, Hayrana ah seat 10, Jharkhand ah seat 4, Delhi-a seat 7 awm zawng zawng, Odisha ah seat 6, Uttar Pradesh ah seat 14, West Bengalah seat 8 leh Jammu and Kashmir ah seat 1 te a ni a.

Inthlan thawruknaah hian candidate langsar zingah senior BJP leader-te Dharmendra Pradhan, Maneka Gandhi, Manohar Lal Khattar, Sambit Patra, Bansuri Swaraj leh Manoj Tiwari te, Congress hruaitu Deepender Singh Hooda, Kumari Selja, Raj Babbar leh Kanhaiya Kumar bakah Samajwadi Party leader Dharmendra Yadav leh PDP chief Mehbooba Mufti te an tel a.

Election Commission chuan inthlanna felfai taka kalpui anih theih nan ruahmanna a siam a. Chawlh hahdamna tur daihlimte, tuisik inturte, ramp, inthiarna, wheelchair leh mamawh dangte polling booth ah siam vek a ni. Inthlanpui thawruknaah hian vote nei mi vaibelchhe 11.13 an awm a.Inthlana buaipui turin polling station nuai 1.14 chuangah mi nuai 11.4 chuang ruat an ni. Waviin vek khan Odisha Assembly inthlan thawh thumna neih a ni baw k a. Assembly bial 42 ah vote thlak a ni a. Hei bakah hian Assembly bial pahnih Haryana-a Karnal bial leh Uttar Pradesh-a Gainsari ah te by- election neih a ni baw k.

Hetihlai hian inthlan thawh sarihna leh a hnuhnung ber atana campaign pawh ngawrh takin kalpui mek a ni a. State 7 leh UT pakhat huamchungna Parliament bial 57 ah June ni 1 ah vote thlak a ni ang.

<><><>

#### PAPUA NEW GEUINEA LANDSLIDE

Papua New Guinea-a leimin avanga thi zat chu mi 300 an tling tawh. Australian Broadcasting Corporation sawidanin vanduinna thlenna hmun hi Enga province-a Kaokalam kuaah a ni a. Chenna in 1100 chuang leiminin a chhilh a ni. Mulitaka Province ah pawh thingtlang khaw parukah leimin nasa avang hian harsatna an taw k a ni.

Papua New Guinea hi Australia hmarlama awm a ni a. Hnam chi hrang hrang awmna niin tawng chi 800 chuang hman a ni a. Mihring maktaduai 10 vel an cheng a ni.

<><><>

## CYCLONE REMAL

Bay of Bengal tuipui chhak lama thlipui cyclone Remal imun mek chuan zanin hian zual lam a pan chho dawn a. Naktukah khawmual thlengin Bangladesh leh West Bengal tuipui kam vel a nuai dawn niin India Meteorological Department chuan a sawi a. Hei vang hian West Benga, Odisha tuipui kam velah te ruahsur nasa tak an dawng dawn nia hrilhlawk a ni a. Hei bakah hian hmarchhak state thenkhatah pawh ruah a sur nasa dawn nia sawi a ni.

Cyclone tleh thei avang hian National Crisi Management Committee chu nimin khan an chairman Cabinet Secretary Rajiv Gauba hoin an thukhawm a. Ruahmanna leh inpuahchahna kalpui dan hrang hrangte an thlir ho a ni.

<><><>